



## 拘耳公

恁久又聽著學校肚个細人仔搥出空頭，講麼个佢等在學校轉手賣搞寮个東西。雖然係搞過个舊貨，但係轉手賣，還會做得賺一手。

這消息一出來，黏時就有教育方面个學者專家在雜誌、網路發表自家个看法。佢等正經个在分析，這係麼个現象，符合麼个教育理論，對學生个人格同學業會有麼个影響？對文章肚看起來，蓋像恁仔个行為在細人仔世界係不得了个，萬一係無處理好就會培養出掣人个梟雄，係無就會教出刷人放火个惡霸。

無恁嚴重！係恁起過去臺灣經濟還無飛起來个四、五十年代，該當時个細人仔踢銅罐仔、賭煙盒仔算係相當正常个。該下，毋係拈紙炮仔搞，就係搏樹乳。有時節鋸那机仔个樹机做鳥射仔來搏鳥仔，無注意著還會同人屋下个玻璃窗打壞。去到學校，下課除核吊晃槓、跳上跌落，褲袋過深个細人仔會買圓牌仔，無就買 miˋ da jiˋ 來搞。佢等當晝飯包就淨一粒灰鴨春个，總係弛綱打陣搞騎馬相刷、殺頭剝腳。有兜个還會收集別人个信封絡仔，脫郵票來賭。係毋驚肉痛个同學就會踢鍵仔，賭拘耳公。

在該年代，除核爭晃槓、係無就細俵撩細妹以外，從來毋識聽過有麼人會因為賭郵票輸忒多，來去投先生。也毋識有哪儕人搞輸踢鍵仔分人拘耳公，拘到歸个耳公紅啾啾，歸屋下學分大人儕聽个。輒常有同學賭輸圓牌仔，輸啊淨淨，佢又想愛再搞，結果連買糖仔食个錢都拿出來買歸去再搞。該賣圓牌仔个同學將錢拿去買糖仔食，歸尾結果也分分大家共下食，半息都無人會相爭。

在細人仔个世界，其實無麼个法律觀念，也無忒多大人个梟雄。該愛仰般來相處，儕儕都有一定个規矩，這兜規矩從來就無白紙烏字寫出來。係萬一有人愛搞、賭輸又不服，了不起往後無人會尋佢共下寮。就像識有人搞迂地球，一下無堵好就同手骨拌斷，嘛毋識聽過對方个大人儕來討賠償。但係今下社會講係進步也！結果大人个法律觀念混入來細人仔个世界，家家大人儕在屋下三交代四吩咐，同別人共下寮要注意，莫搞忒過分，係無斯會賠人錢財。

複雜也！講就講係細人仔過有規矩咧、教育个理論在學校確實推行也！其實係破壞細人仔學習人同人共下相處个能力，該種同人協調、交涉个能力。最嚴重个，無定著係佢等个童年失去也一份單純个感情。

作者：陳志寧

### ☆詞彙學習☆

【掣人】cadˋ nginˋ：詐騙人。

【學】hog：投訴。

【搏】bog：用橡皮筋彈射。

【圓牌仔】ianˋ paiˋ eˋ：圓形的紙牌。

【鳥射仔】diauˋ sa eˋ：彈弓。

【迂地球】dinˋ ti kiuˋ：旋轉地球儀的遊樂設施。

【miˋ da jiˋ】：玻璃珠。

【拌斷】panˋ tonˋ：摔斷。

【灰鴨春】foiˋ abˋ cunˋ：鹹蛋。